

## NY FILOHAN'NY REPOBLIKA

\*\*\*\*\*

**ANTONY : Fanamafisana ny ady amin'ny kolikoly sy ny fiarovana ny fananan-tany**

Andriamatoa PRAIMINISITRA, LEHIBEN'NY GOVERNEMANTA,

Ramatoa sy Andriamatoa MINISITRA isany,

Andriamatoa SEKRETERAM-PANJAKANA isany,

Andriamatoa MINISITRA LEFITRA,

Ho fanatanterahana **ny « Velirano » mikasika ny fanamafisana ny fanapariaham-pahefana sy ny fiarovana ny fitantanana ny fananan-tany** dia efa maro tokoa ny ezaka vita sy notanterahana teo anivon'ny Governemanta, nefà mbola betsaka ihany koa ny tsy vita sy ny miandry, hahatratrana io tanjona io.

Satria tokoa mantsy **mitana toerana lehibe sy manan-danja ary isan'ny fepetra ilaina ny hampazava ny toetry ny tany**, mba hahafahana mampivoitra sy mampivelatra ny fampiasam-bola ary hahafahan'ny tomponentany **misitraka sy mitrandraka ny taniny ao anatin'ny filaminana**. Misy fiatrainkany ihany koa amin'ny fampivoarana ny tontolon'ny fandraharahana ny fisian'ny fanatsarana ny sehatry ny fananan-tany. Ary indrindra tokony **hitondra fitonianana eo amin'ny vahoaka izany**.

Izany no hahafahantsika manatratra ny tanjona napetraka, entina hampandrosoana ny toe-karena eto Madagasikara, araka izay efa voalaza ao anatin'ny PEM.

Araka izany, **dia ao ny fanomezana ny « certificat foncier » izay taratasy avy amin'ny « guichet foncier » napetraka eny anivon'ny Firaiana (Commune)**, izay manan-kery mitovy amin'ny « Titre foncier » ka manome zo **ilay olona ho tompon'ny tany izay nohajariany**.

Na eo aza izany rehetra izany, araka ny fantatra, dia betsaka ary mihamaro tokoa ny raharaha momba ny ady tany eny anivon'ny **fitsarana izay mitarika korontana sy tsy fandriam-pahalemana eo amin'ny mponina**. Izany dia vokatry ny fahasaratana sy ny faharetan'ny paikady eny anivon'ny fitsarana, **nefa koa indraindray, dia noho ny fisian'ny fanararaotam-pahefana sy ny fanaovana kolikoly amin'ny endriny samihafa**.

Araka ny efa voalazako moa dia tsapa izany mandritra ireo fitsidiham-paritra nataoko **izay nitondran'ny olona ny alahelony noho ny fisian'ny endrika kolikoly** mahakasika olana mifandraika amin'ny ady tany.

*Manaraka izany, araka ny antotan'isa ananana tamin'ity taona ity, dia **eo amin'ny ampahatelon'ny raharaha misy eo anivon'ny fitsarana ihany aloha hatramin'izao no efə voatsara.***

Araka izany dia tsy maintsy mahita vahaolana maharitra sy mivaingana isika, mifandraika amin'izany ary azo tanterahina mba hahafahana manatsara ny fitantanana ny fananan-tany ao anatin'ny fahombiazana sy ny mangarahara. **Tsy maintsy miainga avy amin'ny tompon'andraikitra rehetra isan'ambaratongany avy izany**, toy ny Sampandrahaharan'ny fananan-tany, ny fikajiana ny taratasy fananan-tany, ny mpiandraikitra ny fandrefesan-tany, ny fitsarana ary ireo tompon'andraikitra eny amin'ny firaiana (Commune).

Satria tokoa mantsy, **ny fijerintsika dia tokony hikendry ireo tanjona napetraka mba hahafahana manatratra ireo fepetra tsy maintsy hajaina raha tiana ny hiarovana sy hanatsarana ny fitantan-draharaha** momba ny fananan-tany manerana ny Nosy. Noho izany, manainga ny tsirairay ny tenako mba hanao izay azo atao rehetra, hanatratrana izany tanjona izany.

Noho izany, dia hanao ny ezaka rehetra isika hahafahana manatsara hatrany ny sehatry ny fitantanana ny fananan-tany ka hanatanteraka hetsika azo tsapain-tanana, toy ny :

- **fanafainganana ny fitsarana ireo ady tany** eny anivon'ny fitsarana;
- **fanalefahana ny fombafomba sy paikady ampiharina amin'ny resaka tany**, na eny amin'ny sampandrahahara momba ny fananan-tany izany na eny anivon'ny fitsarana;
- **famporisihina ny mponina hanaraka ny fitsipika rehetra ka hanao izay haha-ara-dalàna ny tany izay novidiany**, na koa ireo tany ipetrahany;
- **fahafahan'ny olona mahazo sy mahafantatra ny mombamomba ny lalàna rehetra** izay manan-kery mikasika ny fananan-tany, manoloana ny tsy fahafantaran'zy ireo izany;
- **fandaminana sy fanatsarana ny fampandehanan'asa** eny amin'ny sampandrahahara miandraikitra ny fananan-tany;
- **fampivoarana ny fampiasàna ny tekinolojia**, na eo amin'ny fitantanana ny fananan-tany izany, na eo amin'ny fanafainganana ny fikirakiràna ireo antotan-taratasin'ady **ao anatin'ny mangarahara tanteraka amin'ny ambaratonga rehetra ary mba hananana antotan'isa marina sy mazava; ka tsy azo disoina na hanaovana fisolokiana;**
- **tokony hampitomboina ny isan'ny « guichet foncier » mamoaka ny « certificat foncier » satria mbola 561 ihany ny isany amin'izao fotoana izao, raha toa ka miisa 1695 ny firaiana (Commune) tokony hametrahana izany;**
- **ny fanomezana fiofanana an'ireo tompon'andraikitra rehetra miainga any ifotony**, toy ny fokontany izany, mba hahafahan'zy ireo misoroka, araka izay azo atao, ny ady tany mety hisy eny anivon'ny vahoaka.

**Araka ny efa nambarako dia tsy miantsy hatao vaindohan-draharaha ny fametrahana vaha olana maharitra hamahana ny olana mahakasika ny ady tany.** Ilaina ny fametrahana rindran-damina sy rindran'asa vaovao mahomby sy mangarahara kokoa eo anivon'ny Fitsarana mba ahafahan'ny rafi-pitsarana isan'ambaratongany manatsara ny fomba fiasa, **manamora ny fanaraha-maso ny fandraisana an-tanana ireo antontataratasin'ady maro be voaray eo anivon'ny fitsarana.** Koa miantsy sy manainga ny Minisitra tompon'andraikitra,ireo mpitsara sy mpiantsedra rehetra eo anivon'ny fitsarana ary ny parlemantera handray ny tandrify azy ary hiaraka hikaon-doha ho an'ny fanatanterahana ireo fepetra ireo mba hanatratrana ny tanjona kendrentsika.

Noho izany, dia manao antso avo, ny tenako ny mba handraisana **anjara mavitrika amin'ilay Fihaonambem-pirenena momba ny fananan-tany izay ho tanterahina ny 08 sy 09 ary 10 jona 2022** ho avy izao, hitadiavana vahaolana maharitra sy mifandraika amin'ireo sakana rehetra manodidina izany.

Andriamatoa Praiminisitra, Ramatoa sy Andriamatoa isany Mpikambana ao amin'ny Governemanta, raharaha iraisana ny resaka fananan-tany, ary mahakasika minisitera maro, koa dia manainga antsika tsirairay ny tenako mba samy handray ny andraikitra tandrify azy avy, hahafahana manatsara ny fitantanana ny fananan-tany, hahatonga izany ho fanoitra hampandroso an'i Madagaskara. **Fitsarana marina sy mangarahara, ary manakaiky ny vahoaka no tanjontsika.**

Araky ny Velirano natao tamin'ny vahoaka Malagasy, **dia mila manamafy ny ady amin'ny kolikoly sy misorona ireo disadisa eny anivon'ny fiaraha-monina noho ny ady tany, fa indrindra indrindra mila averina ny fitokisan'ny vahoaka amin'ny fitsarana sy amin'ireo Sampandrahahara misahana ny fananan-tany.** Koa mitodika manokana aminareo tompon'andraikitra isan-tsokajiny ary ny tenako anio. Singaniko manokana amin'izany ireo **Minisitera roa izay voakasika voalohany amin'ity sehatry ny fananan-tany ity dia ny Minisiteran'ny Fitsarana sy ny Minisiteran'ny Fanajariana ny tany sy ny Fananan-tany.** Fototra iorenan'ny fampandrosoana an'i Madagaskara ny sehatry ny fananan-tany satria ahafahana mametraka fiarahamonina mirindra sy mitandro ny tany tandalàna. Raiso ary tanteraho ny andraikitraeo mba ho fanatratrana ny fanovana goavana kasaintsika hapetraka eto amin'ny firenena. **Ka ny fanapahan-kevitra raisin-tsika anio dia ho lova tsara hositrahan'ireo taranaka faramandimby.**

Antananarivo, faha 25 may 2022

**Ny Filohan'ny Repoblika**

**Andry RAJOELINA**



## **TATITRY NY FILANKEVITY NY MINISITRA**

*Alarobia 25 may 2022 – Lapam-panjakana Iavoloha*

Notanterahina androany tao amin'ny Lapam-panjakana Iavoloha ny Filankevity ny Minisitra izay notarihin'ny Filoham-pirenena Andry Rajoelina ary nahitana ny Praiminisitra sy ireo Minisitra isan-tokony.

### **I- FAMPITANA AM-BAVA**

#### **FIADIDIANA NY REPOBLIKA + MINISITERAN'NY TOEKARENA SY NY FITANTANAM-BOLA**

Nankatoavina ny fanafoanan-ketra amin'ny famoahana kaontenera miisa roa misy ireo fitaovana hamitâna ny Grand Séminaire an'i Toamasina.

#### **MINISITERAN'NY TOEKARENA SY NY FITANTANAM-BOLA**

Nankatoavina ny handraisan'ny fanjakana an-tànana ny DTI amin'ny fanafarana hazavana mandravaka (décorations lumineuses) amina baoritra miisa 852.

Nankatoavina ny fampitâna am-bava mikasika ny drafitr'asa fampiharana ireo tolo-kevitry ny Fitsarana momba ny Kaonty, izay mifandraika amin'ireo fandaniana natao tamin'ny ady amin'ny valan'aretina Covid 19.

Taorian'ny fitsirihana nataon'ny Fitsarana momba ny Kaonty mahakasika ireo lafin-javatra efatra niatrehana ny COVID-19, dia ny lalam-bola, ny tsenam-baro-panjakana, ireo fepetra vonjimaika ara-tsosialy sy ireo fepetra fandaminana, ny Minisiteran'ny Toekarena sy ny Fitantanam-bola dia hametraka drafitr'asa sy fanaovazana araka ny tolo-kevitra azo avy amin'io fitsirihana io.

Efa voaomana izany drafitr'asa izany, izay efa niaraha-nidinika tamin'ny Sampana Mpanara-maso ny Fanavaozana ny Fitantanam-bolam-panjakana, ahitana ireo Rafitra mpanara-maso (Fitsarana momba ny Kaonty, CDBF, IGE), SAMIFIN, Minisiteran'ny Fitsarana, ireo Minisitera ara-tsoasialy.

Io drafitra io dia mamaritra ny asa laharam-pahamehana azo atao ao anaty ny fohy sy antonona ezaka, mifantoka indrindra amin'ny fametrahana na fanitsiana ireo didimpanjakana sy boky toro-lalana, ireo hetsika fanentanana, fanapariahana sy fampiofanana, sy ny fanatsaràna ireo fomba fiasa sy rafitra misy.

#### **MINISITERAN'NY TANORA SY NY FANATANJAHAN-TENA**

Nankatoavina ny fampiantranoana ny Tompondakan'i Afrika taranja basket-ball ho an'ireo latsaky ny 18 taona, sokajy lahy sy vavy « U18 Men and Women 2022 » sy ny fandoavana ireo saran'ny fandraisana ny fifaninana (droits d'attribution).

## **MINISITERAN'NY SERASERA SY NY KOLONTSAINA**

Nankatoavina ny fananganana ny Orikesitra nasionaly malagasy voalohany, mitondra ny anarana hoe : « VOA'ART – National orchestra of Madagascar ».

## **MINISITERAN'NY FAHASALAMAM-BAHOAKA**

Nankatoavina ny handraisan'ny Minisiteran'ny Toekarena sy ny Fitantanam-bola an-tanana ny fandraisana anjara ny Governemanta malagasy amin'ny « Nouveau Modèle de Financement » (NMF3) an'ny « Fonds Mondial ».

Taorian'ny fanambaràna nataon' Andriamatoa Filoham-pirenena tany Lyon ny taona 2019, ny Fanjakana Malagasy dia tapa-kevitra ny hitondra ny anjara birikiny, izay mitentina 1.000.000 tapitrisa dolara ao amin'ny “Fonds Mondial” mba entina hanampiana amin'ny fanatanterahana izany ady atao amin' ny valan'aretina izany.

## **SEKRETARIAM-PANJAKANA MISAHANA NY TANANA VAOVAO SY NY TOERAMPONENANA EO ANIVON'NY FIADIDIANA NY REPOBLIKA**

Nankatoavina ny handraisan'ny fanjakana an-tanana ireo DTI amin'ny fahatongavan'ireo fitaovana fanampiny ilaina amin'ny fametrahana ny faritra fihazakazahana vita amin'ny Tartan na « Piste d'athlétisme en tartan » ao amin'ny Kianja Barea Mahamasina.

## **II- FANKATOAVANA DIDIM-PANJAKANA**

### **MINISITERAN'NY FITATERANA SY NY FAMANTARANA TOETRANDRO**

Noraisina ny didim-panjakana manova ny didim-panjakana laharana faha 2022-440 tamin'ny 30 martsa 2022 izay manambara ny maha tombontsoan'ny daholobe ny fanamboarana sy ny fanarenana ireo fotodrafitsara mifandraika amin'ny “trains urbains” na eto Antananarivo, manomboka eo amin'ny Soarano PK 0 mankany Ambohimamanambola PK 12 (Corridor Sud).

### **MINISITERAN'NY ASA VAVENTY**

Nankatoavina ny didim-panjakana manambara ny maha tombontsoan'ny daholobe ny asa fanamboarana sy ny fanarenana ny RN secondaire 43 mampitohy an'i « Faratsihô - Sambaina ; Ambohibary - Ampetsapetsa » ka afaka maka ny tany na fanorenana voakasik'ireo ny asa fanamboarana ireo na amin'ny fifampiraharohana na amin'ny fanesorana noho ny tombontsoan'ny daholobe.

## **MINISITERAN'NY ASA VAVENTY + MINISITERAN'NY TOEKARENA SY NY FITANTANAM-BOLA**

Nankatoavina ny didim-panjakana manambara ny maha tombontsoan'ny daholobe ny asa fanamboarana sy ny fanarenana ny RN44 sy RNT12A, ireo lalan-kely mifandraika amin'izany, ny fanorenana ny tetezana miisa roa ao Manambondro sy Amboenato hita ao amin'ny RNT12A, ny fanorenana toerana fandanjana fiara miisa roa eo amin'ny RN44 izay mamaritra ny fomba enti-manatanteraka ny PAR na ny Plan d'Action de Réinstallation izay entina mamaha izay mety ho fitohanana haterak'ireo asa notanisaina ireo.

### **III- FANENDRENA MPIASAM-PANJAKANA AMBONY**

#### **MINISITERAN'NY FANAJARIANA NY TANY SY NY SAMPANDRAHARAHAN'NY FANANAN-TANY**

- Noraisina ny didim-panjakana manafoana ny didim-panjakana laharana faha 2021-905 tamin'ny 08 septambra 2021 ary manendry an-**dRamatoa RAMBININTSOA Lalao Berthe**, ho « Directeur des Affaires Juridiques » eo anivon'ny minisiteran'ny fanajariana ny tany sy ny sampandrahaharan'ny fananan-tany
- Noraisina ny didim-panjakana manafoana ny didim-panjakana laharana faha 2021-1120 tamin'ny 20 oktobra 2021 ary manendry an'**Atoa.RAMASIMBAMALAZA Olivier José Michel**, ho « Directeur des Services Topographiques » eo anivon'ny minisiteran'ny fanajariana ny tany sy ny sampandrahaharan'ny fananan-tany.

#### **MINISITERAN'NY TOEKARENA SY NY FITANTANAM-BOLA**

- Noraisina ny didim-panjakana manafoana ny didim-panjakana laharana faha 2019-260 tamin'ny 07 martsa 2019 ary manendry **an-dRamatoa RANJAVOLOLONA Julie Claudette**, ho « Directeur Général de l'Autorité de Régulation des Marchés Publics » ny minisiteran'ny toekarena sy ny fitantanam-bola
- Noraisina ny didim-panjakana manafoana ny didim-panjakana laharana faha 2006-792 tamin'ny 19 okotobra 2006 ary manendry an-**dRamatoa RAHARINIAINA Angélinà**, ho « Président du Comité de Réglementation et de Recours auprès de l'Autorité de Régulation des Marchés Publics » ny minisiteran'ny toekarena sy ny fitantanam-bola.
- Noraisina ny didim-panjakana manafoana ny didim-panjakana laharana faha 2017-651 tamin'ny 10 jolay 2007 ary manendry an'**Atoa JAONASY Anivosoa**, ho « Directeur de l'Audit Interne auprès de l'Autorité de Régulation des Marchés Publics » ny minisiteran'ny toekarena sy ny fitantanam-bola

#### **MINISITERAN'NY ATITANY SY NY FITSINJARAM-PAHEFANA**

Noraisina ny didim-panjakana manendry an'Atoa **RABETAHINA Pascal Pierrot**, ho Tale Jeneralin'ny Fitsinjaram-pahefana ny minisiteran'ny atitany sy ny fitsinjaram-pahefana.

#### **MINISITERAN'NY FIZAHANTANY**

Noraisina ny didim-panjakana manendry an-**dRamatoa BEHAJAINA Cathy Milena**, ho Talem-parity ny Fizahantany any Atsinanana

## **MINISITERAN'NY FAMPIANARANA AMBONY SY NY FIKAROHANA SIANTIPIKA**

- Noraisina ny didim-panjakana manendry ireo « Responsables de Domaines » (Doyens de Faculté, Directeurs d'Ecole et/ou Institut) an'ny Universite an'Antananarivo
- Noraisina ny didim-panjakana manendry ireo « Responsables de Domaines » (Doyens de Faculté, Directeurs d'Ecole et/ou Institut) an'ny Universite Antsiranana
- Noraisina ny didim-panjakana manendry ireo « Responsables de Domaines » (Doyens de Faculté, Directeurs d'Ecole et/ou Institut) an'ny Universite Mahajanga
- Noraisina ny didim-panjakana manendry ireo « Responsables de Domaines » (Doyens de Faculté, Directeurs d'Ecole et/ou Institut) an'ny Universite Toamasina
- Noraisina ny didim-panjakana manendry ireo « Responsables de Domaines » (Doyens de Faculté, Directeurs d'Ecole et/ou Institut) an'ny Universite Fianarantsoa
- Noraisina ny didim-panjakana manendry ireo « Responsables de Domaines » (Doyens de Faculté, Directeurs d'Ecole et/ou Institut) an'ny Universite Toliara

## **MINISTERAN'NY ASA VAVENTY**

Noraisina ny didim-panjakana manafoana ny didim-panjakana laharana faha 2021-1240 tamin'ny 10 novambra 2021 ary manendry an'**BOTO ZAFIMANDIMBY Arson**, ho Talem-parity ny asa vaventy any Itasy.

## **MINISITERAN'NY FAMPIANARANA TEKNINA SY NY FAMPIOFANANA ARAK'ASA**

Noraisina ny didim-panjakana laharana faha 2021-370 tamin'ny 31 martsa 2021 ary manendry an'**Atoa.RAKOTOARISON Gildas**, ho talem-parity ny fampianarana teknika sy ny fampiofanana arak'asa ao Boeny

## **MINISITERAN'NY TONTOLO IAINANA SY NY FAMPANDROSOANA LOVAIN-JAFY**

- Noraisina ny didim-panjakana manendry an'**Atoa. ANDRIANIRINA Harinaivo Fanomezantsoa**, ho « Directeur de l'Unité de Lutte contre la Corruption » eo anivon'ny minisiteran'ny tontolo iainana sy ny fampandrosoana lovain-jafy.
- Noraisina ny didim-panjakana manendry an'**Atoa.RANDRIANANTENAINA Fenoheray Rarivoarivelox**, ho « Coordinateur Général de l'Organe de Coordination des actions stratégiques de la Diplomatie Verte et des Organisme Rattachés » eo anivon'ny Minisiteran'ny tontolo iainana sy ny fampandrosoana lovain-jafy

## **IV- FANAFOANANA**

### **MINISITERAN'NY FANAJARIANA NY TANY SY NY SAMPANDRAHARAHAN'NY FANANAN-TANY**

Noraisina ny didim-panjakana manafoana ny didim-panjakana laharana faha 2021-1083 tamin'ny 13 okotbra 2021 ary manendry ny « Directeur des Ressource Humaines » anivon'ny minisiteran'ny fanajariana ny tany sy ny sampandrahaharan'ny fananan-tany

### **MINISITERAN'NY ATITANY SY NY FITSINJARAM-PAHEFANA**

Noraisina ny didim-panjakana manafoana ny didim-panjakana laharana faha 2021-983 tamin'ny 29 septambra 2021 ary manendry ny « Directeur de Ressources Humaines » ny minisiteran'ny atitany sy ny fitsinjaram-pahefana

## **MINISITERAN'NY FAMPIANARANA AMBONY SY NY FIKAROHANA SIANTIFIKA**

Noraisina ny didim-panjakana manafoana ny didim-panjakana laharana faha 2020-1689 tamin'ny 09 desambra 2020 ary manendry ny « Directeur du Centre Régional des Œuvres Universitaires d'Antananarivo » (CROUA).

**Taorian'ity Filankevitry ny Minisitra izay notanterahina teny amin'ny Lapam-panjakana Iavoloha ity dia nihazo avy hatrany ny Emirats Arabes Unis ny Filohan'ny Repoblika Andry RAJOELINA hanatanteraka fitsidihana ara-pomba ofisialy any amin'ity firenena ity. Ny Filoha Malagasy moa dia anisan'ireo vahiny manan-kaja voaasa manokana handray anjara amin'ny Fihaonam-be iraisam-pirenena arahina fampiratiana ireo haitao ara-kajy mirindra mifandraika amin'ny toekarena nomerika izay hotanterahina any an-toerana. Ankoatra ny fihaonana amin'ireo tompon'andraikim-panjakana ambony any an-toerana dia tafiditra ao anatin'ny fandaharam-potoanan'ny Filoham-pirenena ihany koa ny fifampidinohana amin'ireo mpandrahahaha ara-toekarena maro avy amin'ny sehatra samihafa.**

**Natao ny 25 may 2022**

**Ny Fitaleavan'ny Serasera sy ny Fifandraisana amin'ny Daholobe eo anivon'ny Fiadidiana ny Repoblika**